



KEMENTERIAN SUMBER ASLI
DAN KELESTARIAN ALAM

SIARAN MEDIA

PEMERKASAAN KOMUNITI SEBAGAI PENJAGA ALAM SEKITAR PERKUKUH DAYA TAHAN IKLIM NEGARA DAN PERLINDUNGAN EKOSISTEM

Pemeriksaan komuniti sebagai penjaga alam sekitar (community stewardship) merupakan asas penting dalam memperkukuh daya tahan iklim negara serta memelihara biodiversiti, khususnya dalam melindungi ekosistem melalui pengetahuan tempatan dan amalan lestari.

Timbalan Menteri Sumber Asli dan Kelestarian Alam, YB Tuan Syed Ibrahim Syed Noh berkata, pendekatan berasaskan komuniti kini semakin signifikan dalam mendepani cabaran perubahan iklim yang kian kompleks. Beliau berkata demikian ketika merasmikan **GEF Small Grants Programme (SGP) Malaysia National Conference 2026** di Kuala Lumpur, 1 April 2026.

Menurutnya, SGP berperanan sebagai platform nasional yang menghimpunkan komuniti, agensi kerajaan, sektor swasta serta rakan strategik bagi memperkukuh tindakan alam sekitar berasaskan komuniti. Persidangan bertemakan “*Local Action, Global Impact*” ini memberi tumpuan kepada perkongsian pengalaman, kejayaan dan amalan terbaik daripada projek komuniti di seluruh negara dalam bidang pemuliharaan biodiversiti, daya tahan iklim serta kelestarian mata pencarian.

“Malaysia kini berhadapan dengan tekanan alam sekitar yang semakin meningkat, termasuk kejadian banjir yang lebih kerap serta tempoh kemarau berpanjangan, yang memberi kesan kepada keselamatan makanan, kesejahteraan rakyat dan kestabilan ekonomi. Sehubungan itu, pendekatan berasaskan komuniti amat penting dalam meningkatkan kesiapsiagaan serta keupayaan adaptasi negara,” ujarnya.

Katanya lagi, di bawah fasa pelaksanaan semasa, SGP telah meningkatkan kadar siling pembiayaan kepada sehingga USD75,000 bagi setiap projek, berbanding USD50,000 sebelum ini. Peningkatan tersebut mencerminkan komitmen berterusan dalam memperkasa organisasi berasaskan komuniti dengan sumber yang lebih besar bagi melaksanakan penyelesaian tempatan yang berimpak tinggi.

Tambahnya, sejak dilaksanakan di Malaysia selama 26 tahun, SGP telah menyokong lebih 250 projek komuniti dengan hampir USD8.5 juta dana disalurkan, sekali gus membuktikan bahawa pelaburan berterusan dalam tindakan komuniti mampu menghasilkan impak global yang signifikan dalam menangani cabaran alam sekitar. Kerajaan juga menegaskan komitmen terhadap agenda perubahan iklim melalui *Nationally Determined Contribution (NDC 3.0)* dengan sasaran pengurangan pelepasan karbon sebanyak 15 hingga 30 juta tan karbon dioksida menjelang 2035, selaras dengan aspirasi mencapai pelepasan karbon sifar bersih menjelang 2050.

Persidangan tersebut turut memperkenalkan *Operational Phase 8 (OP8)* yang akan membuka peluang baharu kepada komuniti untuk mengemukakan cadangan projek inovatif dan berimpak tinggi dalam bidang perlindungan alam sekitar, daya tahan iklim serta pembangunan lestari.

KEMENTERIAN SUMBER ASLI DAN KELESTARIAN ALAM (NRES)
3 APRIL 2026

